

La carta da visita dal Grischun

Peider Härtli, il pledader da medias da la Viafier retica, va en pensiun

DA AUGUSTIN BEELI / ANR

■ **La fin da favrer banduna ina persuna impurtanta ses post tar la Viafier retica a Cuir. Igl n'è betg il directur, era betg il schef da finanzas u in dals manaders da partiziun. Peider Härtli è stà durant 24 onns emprima persuna da contact per la communicaziun externa dal tren cotschen.**

Nus indigens na pudain betg ans imaginar ina cuntrada senza la Viafier retica. Ses binaris è creschids cun la cuntrada sco ils guauds, ils culms ed ils flums. L'onn 1889 ha l'emprim tren cumenzà a circular, enfin 1914 è vegnidas avertas tuttas lingias da la rait. Nossa viafier è la carta da visita dal Grischun sco il capricorn en la vopna. Quest manaschi na funcziuna betg senza glied che s'engascha davostiers. Davos mintga locomotiva stat in maschinist, e mintga tren ha in conductur che è emprima persuna da contact per ils passagiers. Sch'i succeda insatge special u sch'i dat da communitgar novitads tar la Viafier retica è quai l'incumbensa dal pledader da medias. Dapi 24 onns è *Peider Härtli* la persuna che ha da tgirar ils contacts cun gassetas, emitturs da radio e televisiun da tut il mund.

«Learning by doing»

La Viafier retica è adina ina tematica, en Svizra ed a l'exteriur. Sch'i dat insatge da communitgar – betg vender bigliets u products, simplamain la communicaziun – entra Peider Härtli en acziun. «L'onn passà hai jau gi 1006 contacts da tut gener», di el repassond la tabella ch'el cumplettescha suenter mintga telefon u suenter mintga scuntrada persunala. I po esser ch'igl è crudà giu in crappun sin la lingia, ch'ins ha preschentà ina nov tren u ch'ins ha electrifitgà da nov ina staziun.

Entaifer il manaschi dal tren cotschen ha Peider Härtli ina unica piazza d'infurmaziun externa. El è commember da l'organiziun «BahnJournalisten-Schweiz». La fascinaziun per la Viafier retica e l'identificaziun cumpletta cun quella è ina clera premissa per intermediar als schurnalists da tut il mund las infurmaziuns giavischadas. Per sia lavur



Peider Härtli e sia successura Yvonne Dünser: Ils davos 24 onns ha il pledader pudì communitgar fitg bleras novitads da la Viafier retica.

FOTO A. BEELI

dovra el ina buna savida generala da las structuradas ed ina tscherta avvertenza per la tecnica. Quai tut emprendian ins cun ils onns atras la metoda «learning by doing», tradescha el. En ses mintgadi professional dovra el blers linguatgs. Dasper il tudestg e rumantsch cunzunt bler talian ed engles. Las frequenzas da l'Italia sajan creschidas enorm ils davos onns, sa il pledader.

Per fortuna naginas catastrofes

L'onn ch'el ha cumenzà sia lavur tar la Viafier retica ha quella gist cumplenì ses 100avel anniversari. Igl han gi lieu festivtads ed igl è cumparids cudeschs giubilars. Dapi questas commemoraziuns è passads 24 onns e Peider Härtli po raquintar in'istorgia da bunamain mintga kilometer da la lunga rait tranter Scuol e Mustér, Tirano e Landquart. Dapertut hai dà insatge da rapportar. Era staziuns è vegnidas serradas, l'elettronica ha remplazzà persunal da staziun. «Per fortuna hai jau mai stuì annunziar novitads

propi nauschas da catastrofes e morts», di el cun levgiament. Igl haja adina dà glied che saja sa bittada davant il tren, ma mai en quests 24 onns haja dà autras grondas tragedias, sa regorda el.

En quest temp è persunter ils meds da communicaziun sa midads radical. «Cura ch'jau sun entrà en servetsch quà en la chasa d'administraziun a Cuir avev'jau a disposiziun ina maschina da scriver da la marca Hermes. In da mes collegas aveva gist retschavì ina maschina da scriver electrica cun 'Kugelkopf'. Quai era insatge exclusiv.» Da là davent ha cumenzà in svilup epocal en la communicaziun. L'introducziun dals computers persunals, alura da la posta elettronica, pli tard l'arrivada dal telefonin han influenzà sia lavur.

La vusch dal directur

Ina da sias incumbensas regularas durant tut quels onns è stada la redacziun da la gassetta da persunal «InfoRetica». Il pledader da medias vala sco persuna che fa

la punt interna, che collia il persunal. Peider Härtli ha lavurà per e cun quatter directurs, l'emprim cun *Jürg Hatz*, alura da 1990 enfin 2004 cun *Silvio Fasciati*, cun *Erwin Rutishauser* durant sis onns e dapi 2010 cun il directur actual *Hans Amacker*. Per quels è Peider Härtli stà ina persuna da confidenza. En ses post da stab ha el represchentà la direcziun vers anor. Sch'igl era da communitgar ina nova strategia n'annunziava quella betg il directur, mabain il pledader da medias.

La fin da favrer banduna il Jauer ses post. El sa legra da pudair parter en ses temp libramain. Per exempel per ir a la pestga. Ses domicil vegn el betg a transferir da Cuir en la Val Müstair. Las visitas regularas a Fuldera tar ses bab na vegnan tuttina betg a mancar. Mintgatant vegn el er ad inscuntrar ses ami *Remo Cologna*. Peider Härtli raquinta co il bab da *Dario Cologna* ed el è creschids si ensemen a Müstair, ina famiglia abitava da la vart svizra da la barriera da cunfin, l'autra famiglia da la vart taliana.